

Tónlistarskóli Garðabæjar

Reglugerð

1 gr.

Skólinn heitir Tónlistarskóli Garðabæjar. Skólinn er eign Garðabæjar og fer bæjarstjórn Garðabæjar með yfirstjórn hans. Skólinn starfar skv. lögum um fjárhagslegan stuðning við tónlistarskóla nr. 75/1985, með síðari breytingum.

2. gr.

Markmið skólans er að veita almenna tónlistarfræðslu, stuðla að iðkun tónlistar og vinna að eflingu tónlistarlífs í Garðabæ.

Þessum markmiðum hyggst skólinn meðal annars ná með því:

- að halda uppi kennslu í sem flestum greinum tónlistar, þar sem nemendum er gefinn kostur á að stunda nám eftir því sem aðstæður leyfa og með samvinnu við aðra skóla og uppeldisstofnanir um þessa fræðslu
- að búa nemendur undir framhaldsnám í tónlist
- að gera fullorðnum Garðabæingum kleift að auðga tómstundir sínar með tónlistariðkun, eftir því sem kostur er
- að leggja áherslu á félagslegt gildi tónlistariðkunar með þátttöku nemenda í samleik og samsöng
- að skólinn eigi hljóðfæri sem verði leigð nemendum eftir því sem hægt er.

3. gr.

Bæjarstjórn Garðabæjar skal kjósa 5 menn í skólanefnd Tónlistarskóla Garðabæjar og jafn marga til vara til fjögurra ára í senn að lokum hverjum reglulegum sveitarstjórnarkosningum. Jafnframt skal bæjarstjórn kjósa formann og varaformann. Á fyrsta fundi skólanefndar skal kosinn ritari, sem færa skal fundagerðir í gerðabók. Afrit af fundagerðum skulu send til bæjarstjórnar. Allir þeir sem hafa seturétt á fundi skólanefndar svo og varamenn þeirra skulu fá send afrit af fundagerðum skólanefndar.

4. gr.

Skólanefnd hefur umsjón með málefnum skólans í umboði bæjarstjórnar. Formaður nefndarinnar boðar til fundar með dagskrá svo oft sem þurfa þykir. Skylt er að boða til fundar ef tveir nefndarmenn, skólastjóri eða kennarafundur æskir þess. Skólastjóri eða staðgengill hans situr skólanefndarfundi.

5. gr.

Bæjarstjórn ræður skólastjóra að fenginni umsögn skólanefndar. Skólastjóri í umboði bæjarstjóra ræður aðra starfsmenn skólans. Við ráðningu skal þess ávallt gætt að bæjarstjórn hafi samþykkt stöðuheimildir.

6. gr.

Skólastjóri hefur forystu um að móta listræna og faglega stefnu skólans. Skólastjóri fer með daglega stjórnun. Hann ber ábyrgð á að skólastarfið sé í samræmi við reglugerð þessa og skal hann stjórna skólanum í samræmi við samþykktu kennslu- og fjárhagsáætlun. Hann skal framfylgja samþykktum skólanefndar, enda samrýmist þær fjárhagsáætlun skólans. Skólastjóri ráðstafar húsnæði og hefur yfirumsjón með eigum skólans. Skólastjóri kemur fram fyrir hönd skólans gagnvart starfsmönnum og nemendum svo og aðilum utan skólans. Skólastjóri skal skila vinnuskýrslum starfsmanna til starfsmannahalds bæjarins og árita reikninga til greiðslu.

7. gr.

Skólastjóri skal í október ár hvert gera kennsluáætlun næsta skólaárs í samráði við forstöðumann fræðslu- og menningarsviðs. Skólastjóri skal semja fjárhagsáætlun skólans og kynna fyrir skólanefnd.

8. gr.

Aðstoðarskólastjóri og deildarstjórar eru skólastjóra til aðstoðar og starfa að stjórn skólans í umboði hans.

9. gr.

Rekstur skólans skal greiðast með fjárveitingum á fjárhagsáætlun Garðabæjar, skólagjöldum nemenda. Bæjarskrifstofur Garðabæjar annast greiðslur launa og rekstrarreikninga, svo og bókhald Tónlistarskóla Garðabæjar.

10. gr.

Skóladagar nemenda skulu vera á tímabilinu 20. ágúst til 5. júní og skal starfstíminn, einkum kennslutími, aðlagður starfstíma grunnskóla.

11. gr.

Að jafnaði skal ekki krafist inntökuþrófs í skólann. Skólinn áskilur sér rétt til þess að víkja nemanda úr skólanum, ef kennari eða skólastjóri telja hann ekki sýna þá hæfni eða ástundun, sem þeir telja nauðsynlega til árangurs.

12. gr.

Skólagjöld eru ákveðin af bæjarstjórn að fengnum tillögum skólanefndar. Skólagjöld skal greiða í upphafi skólaárs fyrir allt skólaárið og geta nemendur einungis fengið skólagjöld endurgreidd ef þeir hætta námi vegna veikinda eða brottflutnings.

13. gr.

Nemendur skulu taka þátt í tónleikum skólans eftir tilmælum skólastjóra eða kennara. Ennfremur ber nemendum að taka þátt í samleik og samsöng, sé þess óskað.

14. gr.

Reglugerð þessi er samþykkt í bæjarráði Garðabæjar 20. ágúst 2002 og í bæjarstjórn Garðabæjar þann 5. september 2002.

Garðabæ, 5. september 2002

Guðjón Erling Friðriksson,
bæjarritari